



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 8

Yangia anidakangma :



Tir Yimiyim



tir_yimiyim



tir yimiyim

TAPAK 7



El Mencho tepsetba sülen Mexico nung football asayatem thinen



North Korea ruling party lenir inyaktsü Kim maneni shimogo

VOL. XXIII ISSUE NO. 132 (ADOK 132) DIMAPUR SANGTENNÜ (TUSDAY) TSÜKLAI (FEBRUARY) 24, 2026 ₹ 5.00

NGTA-i anogo 2 pen-down strike alitsü

Dimapur, February 23, 2026 (TYO): Nagaland Government Teachers' Association (NGTA)-i February 24 nungi 25 tashi anogo ananü pen-down strike alitsü osang metetdaksüogo.

NGTA nung taoba mapang SSA aser RMSA 2010 & 2013 batches dena lir. Directorate of School Education (DoSE) nem anogo tenetnü züngzüksüba tembangba sülen pen down strike alitsü ta parnoki sangdong ka nung ashi.

September 2, 2022 nü tetuyuba ka ajanga parnok züngsem 2,293 tashi State Education Cadre nung aniok aser iba ya April 21, 2022 nungi tenzüka liasü ta NGTA-i ashi.

Ajisüaka, küm asem süiaka parnok itasen State Account Head nungi masü saka Centrally Sponsored Scheme (CSS)

funding pattern kübok dang angur ta NGTA-isa metetdaksüogo.

Parnoki regular state employees den kasa State Non-Plan Budget nungi itasen agütsütsü atema shidi aiben züluogo saka department nungi telangzüba tajung kecha mali ta parnokisa ashi.

February 16, 2026 nü parnoki School Education nung principal director dangi shidi ka nung anogo tenet züngzüksü saka iba mapang mapa kecha meinyak. Department-i zübazüba toktüsüba ajanga parnoki February 24 nungi 25 tashi pen-down strike alitsüsa akümer ta NGTA-isa ashi.

Department-i item anogo ana tsüngda iba tebilemstü magizükra February 26 nungi tenzüka telangzüba mangu tashi onoki ozüngi melaba ama lungkak aittsü ta NGTA-isa ashi.

Mexico nung drug lord tetsüdi El Mencho tepset

New Delhi, February 23, 2026 (Agencies): Mexico-i Deobarnü Puerto Vallarta aser Guadalajara dena Jalisco state nung security operation tulu ka inyakang drug lord tetsüdi Nemesio Rubén Oseguera Cervantes khasetogo.

Arishi küm 59 tain Oseguera dang "El Mencho" ta ajar aser pa ya Jalisco New Generation Cartel tanishisang liasü. Tapalpa, Jalisco nung sepaitem den khatepdang pa yiru aser pa Mexico City-i tayimtsü ajanga anir aodang asü ta Mexican army-i ashi.

"El Mencho" asüba osang sangdongba sülen cartel gunmen-i garitem rongdoktsü, highways shibang aser security forces den raratep tenzüka.

Security tensa majungba agi ketdangsürtemi public sentongtem aser saisapongtem thinenogo. Jalisco nung 2026 World Cup asaya pezü asayatsü sentong lir aser Deobarnü parnoki lokti sentong tulu ajak athi aser Hombarnü school sodi agütsü.

US Deputy Secretary of State Christopher Landau-i Oseguera tepsetba pelashishia agizükba metetdaksüogo. "Oseguera ya drug kingpins tamajungtiba aser taochi maliba rongnung ka liasü" ta Landau-i ashi.

"Iba ya Mexico, US, Latin

America aser alima atema kanga tajung" ta paisa ashi.

US President Donald Trump-i Mexico dang United States telungi drugs talisa fentanyl yokba azüoktsü atema rongshia arur.

Mexico-i drug shibelenba anema meinyaker ta Trump-i tai tonglokja Mexican exports nung tariffs atutsü amokmerenogo.

Fentanyl yangluba aser United States telungi yokba maparen asoshi US Justice Department-i 2022 nung Oseguera dak tai tonglokja liasü.

Pai aniba teloki Jalisco, Colima aser Veracruz densema Mexican state aika nung mapa inyaker ta US-i ashi.

Jalisco New Generation Cartel ya 2009 nung tentet aser Mexico nung tashitait aser taochi maliba telok tulutem rongnung ka aküm. Iba telokyagi United States telungi cocaine, heroin, methamphetamine aser fentanyl shibelener ta US ketdangsürtemi ashi.

Oseguera ya taoba mapang police ketdangsür ka liasü aser pai security forces den raratepba litsü ulushia liasü.

Mexico nungi ozüng alema tashitait aser taochi maliba teloktem rongnung CJNG ya ka lir ta US Drug Enforcement Administration-i ashi.

KG Kenye-i MLA ajak senden jazüker

Dimapur, February 23, 2026 (TYO): March 2, 2026 nungi tenzüka Fourteenth Nagaland Assembly nung 8 buba session tenzüksü lir aser iba atema Parliamentary Affairs Minister KG Kenye-i February 28 nü MLA ajak senden ka amentsü jazükogo.

14 buba House nung züngsem 60 prong indang senden session

tenzüksü anogo ka lia jatapa amener saka ibaji February 28, 2026 anüngdang 12:00 ako nung Chief Ministers Residential Complex, Kohima nung amentsü atsüzükra ta Minister Kenye-i ashi.

March 1, 2026 Deobar anogo asüba agi iba senden jelia agitsüsa akümer anungji züngsem ajak adentsü mepishir ta paisa ashi.

MoS Nimuben-i Kachari Ruins aser Durga Mandir semdang



Union Minister of State for Consumer Affairs, Food and Public Distribution, GoI, Nimuben Jayantibhai Bambhaniya-i Kachari Ruins semdangdang agiba noksa ka angur.

Dimapur, February 23, 2026 (TYO): Union Minister of State for Consumer Affairs, Food and Public Distribution, GoI, Nimuben Jayantibhai Bambhaniya-i February 22, 2026 nü Dimapur nung Kachari Ruins aser Durga Mandir semdangogo.

Kachari Rajbari Preservation Committee züngsemtemi Union MoS Bambhaniya pelashishia agizük aser Dimasa Kachari

Ruins indang putiotsü aser tamaittsü osang metetdaksü.

Parnokisa la dang konger mesükba nungshilungtem indang rateta ashi aser iba heritage site maneni wazüka aser kümzüka ayutsü nungdakba lemsatap.

Committee-i iba putiotsü nungshilung wazüka ayutsü asoshi maparen inyaka aruba atema tenüngsang agütsür. Iba sobaliba senmang ya tarutsü

pututem asoshi kümzüka ayutsüla ta MoS Bambhaniya-isa ashi.

Laisa ketdangsürtem den sensaksem aser iba nungshilung ajanga Dimasa Kingdom indang senmang balaka sayuba atema pelaba lemsatap.

Iba sülen MoS Bambhaniya-i Durga Mandir semdanga Maa Durga tushia sarasadem aser tepela salem lemsatap.

ANATG 2015 Batch-i School Education Dept nem shidi agütsü

Kohima, February 23, 2026 (TYO): All Nagaland Adhoc Teachers' Group (ANATG) 2015 Batch nung Core Committee-i Department of School Education, Nagaland nem shidi ka agütsüogo.

February 23 nü züluba shidi nung Core Committee-i department dang February 4, 2026 nungi parnoki lungkak aita aruba February 21, 2026 nungi anena atatsü lemtetogo ta shia lir.

February 20 aser 21 anogotem Directorate of School Education nung Core Committee ajanga lokti sendentem ayonga amendang iba lemtet agia liasü ta parnokisa ashi.

2015 batch dak sendakba

kulikatettem mabensaba khuret asoshi tanga lenmang ka bushitsü ta Department-i tezüluba nung nangzükba onoki agizük ta Core Committee-isa ashi.

February 19, 2026 nü department-i ANATG dak sendakba tebilemstütem reprangtsü asoshi special officer mesüra team ka nem mapa nungloktsütsü ta shia liasü.

Lungkak aitbaji telatetba kar nung ajemdaker anena atar aser item rongnung ANATG züngsem 10-i department den documentation aser records bushiba nung yariteptsü dena lir. Iba ya Under Secretary to the Government of Nagaland-i February 13, 2026 nü züluba shidi nung shia lir ta Core

Committee-isa metetdaksü.

Ano, February 12, 2026 nü sorkari ANATG 2015 batch takhangbatem agizüktsü atema inyakdar aser mapa tenzükgogo ta shidi ka nung shia liasü.

ANATG 2015 Batch-i June 30, 2026 tashi nung maparen ajak tembangtsü atema mapang züngzüksüogo.

Iba mapang tsüngda regularization tebilemstü mekoktetra parnoki ozüngi melaba ama lungkak aita ulushia tenzüksü ta Core Committee-isa metetdaksüogo.

Department dangi züluba shidi nung Core Committee, ANATG 2015 Batch Convenor Temsuchiba Aier aser Secretary Lhovito Sheqi nati sign süa lir.

UP nung Nagaland doctor ka dak tim mesüi kongshi; mezüngmeshi

Dimapur, February 23, 2026 (TYO): Uttar Pradesh kübok Gorakhpur nung February 22 aonung mejangjatetba tebur aseme Nagaland nungi tetsür doctor ka dak tim mesüi kongshi aser kin nung ajemdaker mezüngmeshia liasü.

Tetsürla ya All India Institute of Medical Sciences Gorakhpur nung third-year Obstetrics and Gynaecology resident lir aser yasüng 8:00 ako meta Orion Mall nungi meyipa aodang iba lendong ajuru.

Mejangjatetba nisung asem jagi kilometer 1.5 shi jungnüa la sülen

anidak aser idangji o tamajung jemi aser Northeastern maittsü dak rangloker mezüngmeshi asü. Teburtem rongnung katibo la tsübudaktsütsü atema pa tola semzük.

AIIMS campus nung Gate No. 2 anasa tebur asem rongnung kati la dak tim mesüi kongshi ajisüaka lai ola adokdang parnoki la toktsür jena ao.

Tetsür doctor-i North East Federation of All India Resident Doctors (NAFORD) dangi oa iba osang lemsatap aser NAFORD-i X nung Chief Minister's Office tag sür osang sangdongogo.

NAFORD-isa CM Yogi Adityanath dangi shidi ka züluogo aser iba nung tai tonglokja alirtem maittsü jangjatsü aser pua arutsü, aser tetsürla kümzüka ayutsü takhangbatem agütsüogo.

Doctor-i ashiba nung ajemdaker bangdak police station nung FIR ka benokogo ta Senior Superintendent of Police Dr Kaustubh-i ashi.

Iba tesem nung CCTV footage reprangdangdar aser motorcycle ka jangjaogo. Nisungtem bushiteta aputsü atema police telok pezüi bushisüngdang südar.

MTS atema training ka Kohima nung ayongzük



MTS pur atema capacity building training ka Nagaland Civil Secretariat indang Conference Hall, Kohima nung agiba sentong nung Secretary Home, Elizabeth Nguillie-i jembidang tangokba noksa nung angur.

Dimapur, Tsüklai/February 23 (TYO): Peons, Chowkidars, Sweepers aser Malis (batch 3) densema Supervisors, Sardars aser Multi-Tasking Staff (MTS) atema capacity building training ka Conference Hall, Nagaland Civil Secretariat, Kohima nung February 23, 2026 nü agiogo.

Iba training ya Secretariat Administration Branch "B", Home Department, Government of Nagaland ajanga Living for Environment (LiFE) NGO den lungjemer ayongzük liasü.

Secretary Home, Elizabeth Nguillie-i iba sentong nung jembidang, MTS mapa inyakertem nem office inyakim tali tajungba nung angajemshidakja aser yimya shidak amshia Secretariat telungzük nung amshiba ozüing sülen shidak anidaksü mechi küm tenzük mezüing ita ayongzük, ta ashi.

Alima kanga kera melenshia aoba tensa ka nung

Multi Tasking Staff densema nisung ajak atema tanen makai training agitsü tongtipang kumogo ta lai ashi. Lai Nagaland Services (Discipline and Appeal) Rules, 1967 aser Nagaland Government Servants Conduct Rules, 1968 nungi nüngdakba agiteta lemsatop aser sorkar mapa inyaker ajunga item ozüing yagi len anir aser tashi anga anidaksüla, ta ashi.

MTS temi mürekmeju, photocopying, records anepalua ayuba, office osettsüset amshiba aser office lireptsüka ayuba nung yariteptsüla, ta ashi.

Sorkar indang ki o jen aser osettsüset kumzük ayutsü tongtipang lir, anungji office nung aliba oset anepalua amshitsüla, sorkar meyong osettsüset kecha pei kidangi bener maotsüla, ta lai ashi.

Nguillie-isa electrical appliances amshidang lendong majurutsüsa kanga kumdanga amshitsü shia liasü.

Nagaland nung

establishments tulutiba nung inyakba ama khuret tulu lir, anungji employees temi pei mapa nung temulung agütsütsüla, ozüing sülen shidak anidaksüla, yimya tajung amshitsüla, ta ashi.

Lai office mapang uniform asemtsü tongtipang ta ashi aser MTS ajungai küm shia pei indang APAR forms fill up asütsü metetdaksü.

Iba training nung shisalen sayur Niksungla, Founder-Chairman of Living for Environment (LiFE) ajanga modern sanitation practices, jana-ona junga ketdang asüba, mürekmejuba oset anepalua amshiba, mapa inyakba tesem nung yimya balala, pei mürekmejua aliba amala yimyatem sayua liasü.

Iba training sessions ya February 16, 2026 nungi tenzük aser February 26, 2026 tashi anogoshi anepdang 10:00 ako nungi 11:00 ako tashi Civil Secretariat, Kohima indang Conference Hall nung agitsü.

NECTAR ajanga ESS indang training ayongzük

Dimapur, Tsüklai/February 23 (TYO): Nagaland Education Project-The Lighthouse (NECTAR) ajanga Lighthouse School Complexes (LSCs) 16 indang Contractors atema "One Day Training and Orientation on Environment and Social Standards (ESS)" sentong ka Directorate of School Education (DoSE), Kohima nung February 20, 2026 nü ayongzük liasü.

Shashank Pratap Singh, IAS, Principal Director, DoSE & Project Director, NECTAR ajanga pela agizükba o jembidang LSCs kota tongtipang ta asüba indang rateta ashi aser World Bank-i yariba NECTAR project kübok LSC contractors ya yimya shidak amshia tender agütsüba nung ajemdaker shim ta metetdaksü.

Iba yongji pai Contractors ajunga dang mapang shidak nung mapa shidak inyaktsü

asur World Bank ajanga tuyuba ama Environmental and Social Standards (ESS) shidak amshitsü ayongzük liasü.

Commissioner and Secretary of School Education & SCERT and Vice Chairperson, NECTAR Project Steering Committee, Kevileno Angami-i iba sentong ayongzükba nükjidong lemsatopba mapang, Nagaland nung school tem tensa mejungi aliba atema bilema Department-i LSC nung tongtipang facilities balala inoktsü ta ashi.

World Bank, Department of Economic Affairs aser state sorkar teyari nung district shia LSCs yanglutsü mangdang aliba asangsang akumtsü ta ashi.

Lai contractors tem dang mapang shidak nung civil mapa renemtsüsa meranga inyaktsü ajungshia liasü. Angami-i libajen aser nüburttem timtem

majurutsüsa ki o jen yanglutsü ayongzük liasü.

Advisor, School Education & SCERT, Dr. Kekhrielhoulie Yhome-i sentong nung jembidang, Nagaland yimdak yimtsüngtem nung school ki temeimtsü tia nung lir asünung LSC yangluba merenemra kanga tia maka asütsü, ta ashi.

Tangya terenlok maparen balala atema Public-Private Partnerships (PPP) aser multilateral projects tem nüngdaker, aser state tejakleni aotsü asoshi Environment and Social compliances nüngdaka kumogo ta ashi.

Global evaluation standards küboki tarutsü terenlok maparen aita daksütsü asünung, asenoki contract mapa akhi ama inyakra, tarutsü asoshi teimla mali, ta Advisor-i ashi.

Nagaland nung tarutsü nung project balala inyaktsü atema LSC contractors dak tuluka keta lir ta paisa ashi.

DC Mokokchung ajanga arms verification atema metetdaksür

Dimapur, Tsüklai/February 23 (TYO): 28-Koridang Assembly Constituency nung bye-election tiptema agitetsü mechi Deputy Commissioner & District Election Officer of Mokokchung, Ajit Kumar Verma, IAS ajanga district telungzük nung aliba prangbong aser injang ajunga physical verification alitsü metetdaksüogo.

Arms Act, 1959 indang Section 21 benoka DC Mokokchung ajanga Mokokchung District kübok arms license alir ajunga dang pei anasatiba Police Station nem osang agütsütsü tuyu. License alirtemi office mapang physical

verification atema prangbong/ injang aser license booklets bener arua agütsütsüla. Iba maparen March 20, 2026 tashi inyaktsü.

Iba maparen shidak inyaktsü atema police stations shia Officers-in-Charge temi anogoshi osang prescribed format nung Sr. Superintendent of Police, Mokokchung ajanga agütsütsüla.

Item report nungya Sl. No, license holder tenüing, license number, UIN No, Type of Arms & No, last renewal date, aser No. of ammunition available tejangja agütsütsüla, ta sangdong ajanga ashi.

NBHM-i SHGs aser VDVKS nem training agütsü



Dimapur, Tsüklai/February 23 (TYO): Nagaland Beekeeping and Honey Mission (NBHM) ajanga Self Help Groups (SHGs) aser Village Development and Value Chain Committees (VDVKs) nungi trainers atema 'Value Addition of Honey and its By-Products' training ka February 18-19, 2026 anogotem Multi Utility Centre, Chümoukedima nung ayongzük liasü.

Mezüing session ya Secretary to the Chief Minister & Team Leader, NBHM, Sentiwapang Aier-i moaja aden aser training agirtem dang külemi aintsü aser ninang mojitzü ajanga senotsü lenmang lapokba indang training state nung tang mezüingbuba agiba nung temulung agüja adentsü ayongzük.

Product development, financial literacy, resource management aser personality development ajanga talusa tetsürtem nem tashi agüja entrepreneurship aser financial independence tashi itshitsü nükjidong nung iba sentong ya ayongzük, ta pai ashi.

Anogo ana sentong nung hands-on sessions balala agia liasü. Mezüing anogo training agirtem dang balms, chiyongtsü alepba, temo milen aser wax blocks ama beeswax products balala yangluba indang sayua liasü.

Ananü buba nung food processing, honey wine yangluba, honey dak ajemdaker chiyongtsü yangluba, value chain development, entrepreneurship, packaging, labelling, aser marketing strategies nung amshiba yimya, hygiene aser osettsüset indang angatetdaksü.

Training nung shilem agirtemi taoba mapang beeswax nung rongsen lenmang aliba memeteti atsüki nungsa indok ta ashik. Iba training ajanga parnoki item nung jenjang aliba tali jangjateta liasü.

Asenoki natural resources kanga shisa kaa amshiba atema ninang temia asenok asoshi nüma tanga bilema alitsü, ta training agir kati ashi.

Iba training nung shisalen sayur ya NBHM nungi technical team aser Lovi Achumi, Proprietor, Tsuipu Food Products liasü.

Training tembangba sentong O.P. Mounglang, DGM, National Bank for Agriculture and Rural Development (NABARD)-i maotsü aser training agirtem nem tenüingsang agüja parnoki angazükba amshia takum nung lenmang tasen lapokyonga aotsü ajungmesoa liasü.

Iba training sentong nung district 17 nungi nisung 25 arua training ya agia liasü.



February 23, 2026 nü New Delhi nung RBI Central Board senden amenba sülen Union Finance Minister, Nirmala Sitharaman aser RBI Governor Sanjay Malhotra (ajichilen nungi tanabuba) na den tangartemi osangbenertem den jembidang tangokba noksa nung angur.

Indian Embassy-i sensotem dang Iran toktsür aotsü ajungshir

New Delhi, Tsüklai/February 23 (Agencies): US aser Iran na tsüngda amokmerentepa arudar aser ibaji ajanga Middle East nung rara tulu adoktsüsa aliba tensa ka nung Hombarnü Iran nung aliba Indian Embassy-i India nungertem dang iba linük toktsür aotsü metetdaksüogo. Indian Embassy-i India nungur kaketshirtem, temeshi ainlen jajartem, business inyakertem aser raliwalirtem dang commercial tayimtsü densema transport balala ajanga iba linük toktsür aotsüla, ta metetdaksü. Indian Embassy-i, "Taküm January 5 nü India sorkari sensotem nem tekümdangtsü osang metetdaksüogo aser maneni Iran nung tensa mejungi akümba nung

ajemdaker tang Iran nung aliba India nungertem (kaketshirtem, temeshi ainlen jajartem, business inyakertem aser raliwalirtem) dang tayimtsü densema transport balala ajanga Iran toktsür oang ta metetdaksür," ta metetdaksü. "January 14, 2026 nü metetdaksüba ama maneni India nungur ajak aser PIOS ajak dang kanga kümdanga alitsü, longkak aitba tesemi maotsü, Iran nung aliba Indian Embassy den tongtepratepa alitsü aser osangtsüsang metetpela alitsü mepishir," ta Hombarnü Tehran nung aliba Indian Embassy-i metetdaksü. Embassy-isa India nungertem dang passports aser IDs densema travel documents aser immigration documents ajak renema alitsü

metetdaksü. "Indian Embassy den tongteprateptsü atema emergency contact helplines ji item ya lir- Mobile Numbers: +989128109115; +989128109109; +989128109102; +989932179359. Email: cons.tehran@mea.gov.in," ta parnokisa metetdaksü. Tanü agi tanünübuba Iran nung kaketshirtemi longkak aitogo. Iran aser US na tsüngda nuclear tezüngzüktep ka agitsü atema ken o jembia arudar aser maneni February 26 nü Geneva nung jembitsü. US Tir Donald Trump-i Iran dang, taruba anogo 10-15 tsüngda America den telemetba ka dangi arutsüla, ta metetdaksüogo.

Tamil Nadu nung CEO-i final electoral roll sangdongogo

Chennai, February 23 (Agencies): Hombarnü Election Commission-i Tamil Nadu nung final electoral roll sangdongogo; SIR exercise kübok voters lakh 74.07 tenüng züngdokba sülen final roll nung voters crore 5.67 lir. Osangbenertem den jembidang Chief Electoral Officer, Archana Patnaik-i, SIR exercise magidangbo state nung voters crore 6.41 liasü, ta metetdaksü. SIR exercise kübok tenüng lakh 97.37 züngdok aser revision mapang nung lakh 74 (74,07,207) züngdok, aser tangbo voters crore 5.67 dang kümogo, ta metetdaksü. Laisa, electoral roll nung arrshi küm 18-19 lanur lakh 7.40 züngokogo, ta metetdaksü. Tamil Nadu nung electoral roll merüktetsü atema Special Intensive Revision (SIR) exercise ya yaküm October 27 nü tenzüka liasü aser Hombarnü

final roll sangdong. October 27, 2025 anogo tashi nung state nung voters 6,41,14,587 liasü aser December 19, 2025 nü draft roll sangdongba mapang voters 5,43,76,756 dang aküm. "Tashishiba agütsüsü atema December 19 nungi January 30, 2026 tashi mapang agütsü aser iba mapang nungi temsüa aliba voters lakh 27.53 bendenlok aser temsüa malir tenüng lakh 4.23 züngdoka liasü," ta lai metetdaksü. Tang electoral roll tasenba nung tebur voters 2,77,38,925, tetsür voters 2,89,60,838 aser Third Gender voters 7,617 lir. Voters rongnung matamabensar lakh 4.63 aser kanga teintet sensotem (arrshi küm 85 ser temapur) lakh 3.99 lir, ta Patnaik-i metetdaksü. Tamil Nadu final electoral roll ji CEO indang website <https://elections.tn.gov.in> nung angutsü, ta laisa metetdaksü.



February 23, 2026 nü Singapore nung Uttar Pradesh Chief Minister, Yogi Adityanath-i Institute of Technical Education (ITE) Headquarters aser ITE College semdangba mapang tangokba noksa nung angur.

JNU nung rara adoka kaketshir aika yiruogo

New Delhi, February 23 (Agencies): Amongnü aonung Delhi nung aliba Jawaharlal Nehru University (JNU) nung longkak ait tenzüka sülen Hombarnep züngia rara adok, aser iba tatalokba nung kaketshir aika yiruogo. Longkak tesashiba ait tenzüka sülen Hombarnep 1:30 meta rara adoka liasü. Left-i aniba students' union aser Akhil Bharatiya Vidyarthi Parishad (ABVP) na tsüngda aitsütepba sülen teka sangshitepa aser lung agi ontepa liasü. JNU administration-i

sangdong ka ajanga, "Longkak aiter kaketshirtemi campus telung nung academic building aika shibangtsüba osang JNU administration-i metetogo. Longkak aitertemji central library telungi ai aser longkak aitba nung shilem agitsü memelunger kaketshirtem amokmerena liasü ta osang angazükogo," ta metetdaksü. "Campus telung nung kaketshirtem telok ana tsüngda rara adok. JNU administration-i iba ya süoki ia agir. Aibelenertem nem temerenshi agütsüsü," ta sangdong nung

shia lir. JNU registrar-i, University temzüng aser Bharatiya Nyaya Sanhita (BNS) kübok tim mesüi inyakertem nem temerenshi agütsüsü, ta metetdaksü. Left-i pusemba Jawaharlal Nehru University Students' Union (JNUSU)-i 'Samta Juloo' kübok Vice Chancellor, Santishree Dhulipudi Pandit-i menden nungi anentsüla ta takhangba agüja longkak aita East Gate-i aotsü ayongzüka liasü, ajisüaka ABVP züngsemtemi tetsükdaksü agütsüba nungi tensa raksa.

INDIA teloktep alitsü atema Mamata lenir asütsüla: Mani Shankar Aiyar

New Delhi, February 23 (Agencies): Congress lenir, Mani Shankar Aiyar-i opposition INDIA teloktep dak sendakba nung o kar jembiba ajanga yimtenren nung o entep tenzükogo. Aiyar-i, INDIA teloktep taküm alitsü atema West Bengal Chief Minister Mamata Banerjee ya kanga tongtibang nübo ka lir, ta metetdaksü. Paisa, iba teloktep nung Mamata Banerjee medenibo INDIA teloktep maitsü ya samatsü, ta ashi. Aiyar-i, "Mamata mdenibo INDIA teloktep nung aliba 'I', 'N', 'D', 'I', 'A' ya samatsü, kechiyong iba teloktep nung lenirji Mamata Banerjee lir," ta metetdaksü. Paisa, DMK tongti MK Stalin, Samajwadi Party tongti Akhilesh Yadav aser Rashtriya Janata Dal lenir Tejashwi Yadav ama regional party tem nungi lenirtemi iba teloktep nung tongti shilem agitsü akok, ta metetdaksü. Paisa, Lok Sabha nung opposition lenir, Rahul Gandhi-i temaba menden atsüngtsü memerangtsüla, saka iba teloktep anidaktsütsü atema

party tilatem nungi lenirtem asoshi lenmang lapoktsütsüla, ta metetdaksü. Par party (Congress) dang mepelaba metetdakja pai, "Ni Congress nung lir ta ni bilemer, ajisüaka parnoki ni jendoktsü atema telemetba agir asütsüa akok. Ajisüaka tang tashi nungbo ni iba dak sendakba shidi mangu," ta metetdaksü. "Congress tebilemba metetnüra Congress lenir ka dang asüngdangang. Congress nunga aikati Mamata Banerjee pusema alitsü, ta ni bilemer," ta pai metetdaksü. Tamalen pa TMC nung mapang tatsüka alidang Mamata Banerjee den külemi inyaksemba bilemteta pai oren kar jembia liasü. 1997 küm pa mapang tatsüka TMC nung aden aser mezüngbuba National Secretary ji pa shima liasü, saka hopta ishika tsüngda pai, iba party ya Bengali nungur maitsü nung tera-yanga lir, ta shia pai TMC tokja liasü. International Mother Language Day anogomong nung Aiyar-i oshi aser maitsü wazüka ayutsüji kanga tongtibang, ta metetdakja liasü.



Anogo ishika tejaklen AI Summit agiba tesem nung Indian Youth Congress lenirtemi longkak aitba anema February 23, 2026 nü Hyderabad nung BJP Mahila Morcha züngsemtemi Congress anema longkak aitba noksa nung angur.



TIR YIMYIM YIMOBILEM (EDITORIAL)

DIMAPUR TUESDAY, FEBRUARY (TSÜKLAI) 24, 2026

Angati agütsüba agi raksatsür

Akhidangbo China liasü saka tang yabo alima nung nütsüng teimtiba aliba linükji India kümogo aser tanü tashi nung India nung nütsüng yongsük 1,472,060,995 (Crore noklang ka ser lir tenet lakh metsü meyirijang roker noklang tuku ser tukur pungo) züngdangteta lir. Item nütsüng crore 147 rongnung nisung crore 80 dak tali nem center government-i angati jangotsü agütsür ta taoba hapta Dimapur nung Union Minister of State for Consumer Affairs, Food & Public Distribution, Nimuben Jayantibhai Bambhaniya-i ashibaji temeim osang tajung ka amai saka iba jagi linük nung nisung aika azümesen kumdaktsüogo ta yimsüsürtemi angatetlasang, temeim mapa inyaker ta bilemer inyakdang nisungtem peisasa pei taküm aser tia raksatsüsabo sentong matongla. Atangji, center government ajanga sensakertem nem angati jangotsü agütsübaji sensaker nem temeim agi teyari agütsüba sentong ka asütsü ta asüba tangatetba nung akhidang nungi agüja arur. Ajisüaka, iba teyari angurtem jagi iba teyariji agia tarutsü nungbo peisasa taküm lia aotsü asoshi inyaker masü saka mapa meinyak angati anguba teyariji agia taküm tepiyong alitsü meranger. Atangji, India nungsa süaka tangalenbo yamajia masütsüa akok saka asen lima Nagaland nung item center nungi yokba jangotsü angati angurtem taküm aser kibongtemji reprangdangra, government-i asen meima yarisem dang ano tali meranga inyaka asen kibong tia tajungba akümtsü meranger masü saka asenok aika item angati anguba jangotsüji meshia chiyonger kecha tebilemtsü maka kazüa senzüba nisungtemji asenok lir. Ano, tesüngmangtsü kaji, angatisa mesüaka jenjang kanga dalang agi angati amai center government nungi anguba jangotsü alitsü atema Fair Price Shop aser tayokdak tesemi arurtemji aika pei gari nung aruba purtem lir. Atangji, Delhi nungi teyari yokba jangotsü ya gari akar tashi nem agütsütsü asoshi yokbabo masü saka garijibo yutsür kidang chiyongtsü makartem asoshi yokba teyari lir. Ajisüaka, ashiko asen lima nungbo sensakertem asoshi yokba jangotsüji karibo pei ak an nemang agüja alitsüa akok. Asenok ya iba tashiji azümasen, ochimashi aser ngasangatemba purtem lir. Aji oda, Civil Supply nungi angati mesüra jenjang dalang agi anguba jangotsü bener arua sorutsü aser RD mesüra Urban Development mesüra LADF nungi angati anguba sen agi aon alitsü ta election ka maru tashi lia atartemji asenok lir. Ibaji dang masü saka asenok matumalem aser shisatsü agi matong ser yimsüsürtemi jembiba olen kaji, Nagaland nung Naga nungertem ya Delhi nungi Modi-bai yokba jang chiyonga taküm alirtem lir ta alimai angashia yimjak nung jembir. Ibaji kodang bilemdangdir, aji Nagaland nung alir Naga nung asoshi takok aser nümadangtsü osang kabo masü. Atangji, center nungi sensakertem meima jangotsü teyari yokba atema pelar aser onoka tetibo yamai dangbo center nem mesüdakjabo malitsü tabo shidi süra junger, saka Nagaland nung Naga nung jak relief jang chiyonga alir ta alima dang takok osang ka sangoktsür amai jembiba kolokji alar kolok aser item nübortem ausoji aser jangpongji teti pi kidang alitsü. Iba ama mashi angatetba nungi asenok nüchi akümtsüla aser center nungi yokba jangotsü agi asenok taküm alir ta asüba 'tenüng' ya asenok nungi mali kuma aidoktsüsa asenoki inyaksüla. Asenok Naga nungertem ya, talisa asenok ya, taoba mapangtem nung mapa meinyak ser bill agizüka agiba aser mapa meinyak ser subsidy sen agizüka agiba nungi azümesen aser ochimashi kuma sensak tiai aiba purtem lir aser tang asenok angati anguba jangotsü agi asenok mapa meinyak ayongayonga chiyonga alirtem kümogo. Ajisüaka, asen mapa meinyak ser tangari angati agütsüba agi dang tebok mesüa aliba purtemji ak puoka yur mesür amai dang lir. Aji oda, asenoki kidang puoka yur metsüba ak kodang kechi nüngdak nung amshinüdir amshiba amai, asenoka asen yimsüsüri ashi amaji, Modibai yokba jang chiyongli, kecha tebilemtsü mali kidang monga kazüli asünungbo, asenoka Modiba mulung asütsü aser shitakba tiyazü nung taküm alir kidangmongertem to asenok akümtsü.

OLEMSABANG

AO OSHI DANGI MEYIPDI

~ I. Anungba Sanglir

(ABAM Tetsü Oshi Anogomung nung Unity Ao Baptist Arogo nung jembiba).

(Yashi adok nungi...)

Dr.Clark kinungtsü Mary Mead tena mapang tatsüka agia asen Naga nung Ao kin dang ya Assamese asü Hindi oshi nung zülujang amshidaktsütsü ta jembiteper tatemsata tenati Roman zülujang aser Italian olasü nung sayutsü lemteter mezüngbuba Schoolji Mary Mead-i lapoka tetsürtem dang **ABC** aser **AKA, ANA, ASEM (1,2,3)** zülua azüngtsü indang sayu. Iba ya 1878 küm liasü. Ao oshi nung ken kaket ka **NAGA HYMNS** by Godhula R.Brown 1879 nung zülü. Yangji Kibuba sarasadem yamai zülua lir. 'Lungkizvngba Yisu Krista Pa netsvugdang ya oda sarasedvmtsv o saiyur,' **MVZVNG ASHIBA "Ao Naga Primer."** By Mrs. E. W. Clark, iba kaket nung yamai zülua lir: **ANOGO TENVNG. Deobar, Hombar, Mongvibar, Budbar, Birostibar, Hukurbar, Honibar.** Dr.Clark-i 1884 küm Mathi kaket Greek oshi nungi Ao oshi agi meyipzüka zülü. Yamaji Ao kin nem kaket tapu balala zülur züngdaktüsü, tongtibangsa Dr.Clark-i Ao o karbo tangar oshi nungi agizüka olong kümer Ao o kumdaktsüba: Tatishitsü agi, **Laishiba, Lai** ya tangar oshi nungi bener arua amshiba olong ka lir. **Shiba/ashiba:** Iba ya Ao O nung ashiba/angazükshiba. **Laishiba:** Lai nungi angazükba. **Mission Kibur: Mission** ji Engraji o, **Kiburji** Ao o. **Arogo ya Dr.Clark-i Arürshi khu abenba nungi jatetba.** Yamaji Ao oshi nung maliba o karbo Clark-i enoksema **Laishiba, Ken kaket** aser pai züluba **Dictionary** nung angutsü. Tatishitsü: **Ketdangpur dang Sensongpur, senso nungi songtetertem.** Yamaji jembia aliba oshi to tanü lima den apet yangludena tezüluba nung enoktsür asen tetsü-teboutem **Mathi, Mark, Luk** kaket zünga Tsüngrem o sayua kin balala dangi yok.

Ao oshi nung Yisu Osangtajung otsü jembia, Laishiba zünga, Ao ken tena Ao agi sarasadema temeküt kintem tenük lapoktsü. Mapang kabo tangar kini Ao oshiji **KOTAKER** oshi ama jembia lia aru. Tangar kintem Laishiba aser Ken kaket meyipzükdang English Laishiba den medemdanga Ao Laishiba zünga meyipzükba otsü aika lir. Ao oshi ajanga Tsüngremi Naga nung rongnung aser tangar kin danga sayatenya mapa aika inyakba otsütem lir. **Rev.Yapang Tzüdir SHAMATOR MISSION FIELD** nung inyaka alidang Anütoklen aliba kin ana mangko agitepa raratepdang D.C. Tuensang ajanga pa dang **Yimjung Mapa** inyaksü mepishi, anungji pai **Ao Oshi agi ayimtena Sarasadema, Yimjung O** jembia Tsüngrem tenüng nung tai tatok agütsütepa lungjemdaktsü. **TOBU** atema kin ana raratepdang taküm aika sama, iba tensa nung **Yimyu Baptist Arogo-i achayanga Rev.Riküm, Rev.P. Longri aser Rev.Dr. Imchayanger** nungeri **Ao oshi nung sarasadema** rongrongji Tsüngrem ain agi anendaktsü. Mapang kabo Ao oshi ya Nagaland nung Noklang nung neteribo jembitsü koka liasü, saka tanübo asen Ao kin rongnunga noklang nung neteri dang Ao oshiji jembir aser noklang nung liri dang zülutsü aser jembitsü akoker. Ya kechiba? Asenoki meyipa reprangdangra School-tem nung Ao oshi angazüktsüsa tesayur maliba.

Tanabuba nung Ao Laishiba mazünger aser Ao ken kaket nung aliba matener, Ao o agi sarasadem masür.

Tasembuba nung tsüraburi anir kidang Ao oshi mejembiba ajanga asen kin tetsü taso oji samaa aoba oshi ka kumdagi. Anungji oshi ka kumzüktsü asoshi nisung ka anati temulung agüja oshioben zülua jembiba jagi masü, saka kin rangpen jagi rongrongbangsen madoki tetsü taso Oji zülutsüla aser jembitsüla.

Ao oshi ya samara Ao Arogo ya samatsü, Aor lokti tentet ajak ya loksaa aotsü aser Mathi Mark zünga tenzükertemi aazüka yutsüba, **Mezüngpur lima (LAND OF PIONEERS)** ta ajaba kinji tangar asoshibo menüdong kin ka akümtsü. **PERU** nungeri **"INCA"** kin kaket zülur kati ashiba agi, **'Ni aonung pungmang nung kütsü taso o jembia senzüa pungmang, saka saaker asangsang nungbo ni mejembitet,'** kechiyong par kin oshiji samaadoker.

Yamaji tanü asenoki mekümdangra iba kasaji asen chir daka ataloktsü ana nung lir. Anungji Ao oshi mesamdaktsünera Ao Laishiba azüngtsüla, Ao Ken kaket nungi atentsüla aser Ao oshi nung sarasademtsüla. School aser College-tem nung Ao tesayur meliaka kidang kibong nung Tebu aser tetsüji tesayur tulutiba lir, tenati anir Ao oshi jembira aser sayura asen Ao oshiji renloka aotsü aser wazüka yutettsü. Dr. Clark o Mary Mead-na nungi tenzükertem tanü tashi nung shirnokisa Ao oshioben asoshi kaket zülua teyari tulu agütsüogo asenoki parnok ajak nem tenüngsang agütsür. Tanüa asen tendak kaket zülur nongtugu aika lir, saka item rongnung alakteta talisa asen lenir Senka Walling ama, Osang kaket zülur: Tir Yimyim Yimozülur K.Temjen Jamir ama, aser Ao Milen Yimozülur Wb.Akangnüngsang, nungeri asoshi asenoki Tsüngrem dang sarasademtsüdi.

Tanübo asenok tia junga ABAM Literature Board den külemi Ao Senden kübok Ao Riju teloki asen Ao oshi temaba jenjang ka kumdaktsütsü aser wazüka ayutsü mapa meranga inyakdagi, parnok ajak dang kanga dang pelar. Tsüngremi parnok taküm aser par wadang nung moajang ta asenok ajaki sarasademtsüdi. Maneni Ao kin senso ajaki Ao Riju inyakyim nung nongita yaritsü ayongzükertem.

"Oh Yirusalem, ni na amadokra kü teka tachiji ashirepdakjang. Ni na mebilemtetra, kü tepela tematiba dang taoba ni Yirusalem meyutsüra, kü temeli kü teküm nung neploka kumdakjang." T.Ken 137:5-6. nung shia aliba ama, **Oh! Aolima, ni kü tetsü Oshi amadokra kü teka tachiji ashirepdakjang. Ni na mebilemtetra, kü tepela tematiba dang taoba, ni Ao oshi mejembira, kü temeli, kü teküm nung menaloka kumdakjang.** Tsüngremi Ao kin moajang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Alima nung Khristan nütsüng teimba aliba region ji Africa kümogo

February 23, 2026:

Europe aser America na nung Khristan nütsüng kanga ajema kümogo aser tangbo alima nung Khristan nütsüng teimba aliba region ji Africa kümogo.

Tang Africa nung Khristan nütsüng million 697 lir.

Küm 2,000 jungnüa tejaklen Khristan yimsü ya anüdoklen Rome yimli mapang Yihuda nunger telok

tilaka dang liasü, saka tangbo Khristan yimsü ya alima nung yimsü tulutiba lir.

Aso 4buba mapang nung Europe tesem ajaklen missionary networks liasü, iba sülen America, Africa aser Asia tesem balala nunga Khrista osangtajung prokshi. 2020 küm tashi nung alima nung nütsüng shilem 28.8 bo (billion 2.3) Khristantem liasü.


Pew Templeton Global Religious Futures project-i ashiba agi, tang tashi Khristan yimsü ainer, ajisüaka linük kar nung ajema akümer aser tanga linük kar nungbo Khristan nütsüng kanga renloker, ta metetdaksü.

Akhidangbo Khristan nütsüngji Europe nung teimba liasü saka tangbo sub-Saharan Africa nung teimba kümogo.

2010 küm nungi 2020 küm tashi nung linük aser territories 201 nung survey aser census 2,700 agia liasü, aser item survey ajanga, nisung aikati tain akümdang tamangba yimsü toktsüba bushitetogo.

313 AD nung Constantine Chubai tamangba yimsü mela aser Khristan yimsü ya Rome yimli yimsü ka aküm. Medieval mapang nung Europe tesem ajaklen Khristan yimsü prok aser Aso 15buba nungibo alima tesem ajaklen Khristan yimsü proka liasü.

Spain, Portugal, Britain, France aser Belgium ama linüktemi meta talang nung tesem balala atsünga agiba mapang nunga Khristan yimsü proka liasü. Khristan missionary temi school aser hospital aika



lapoktsü, oshi balala nung Laishiba meyipzüksü aser tesem kar nungbo lisopur yimsü nokdangtsü atema saru agiba den ozüng balala benoka liasü.

Aso tasenba nungbo continent aika nung Khristan yimsü ya tongti yimsü ka aküm.

2010 nungi 2020 küm tsüngda alima nung Khristan nütsüng million 122 bendenloka liasü aser ibaji shilem 6 agi teimba akümba liasü.

Ajisüaka alima nung nütsüng kanga kera arenba mapang nung Khristan masürtema shilem 15 agi teimba aküm, aser ibaji ajanga alima nung nütsüng shilem 31 Khristantem aliba nungi nütsüng shilem 28.8 dang Khristan aküm.

Alima nung Khristan nütsüngji telemsa (category) ka nung dang lir; iba nungji Catholic Khristantem, Orthodox Khristantem, Baptist, Lutherans, Anglicans, Methodists aser Pentecost Khristantem densema lir.

Akhidang nungi Khristan nütsüng teimba aliba region ji Europe liasü ajisüaka tangbo Khristan nütsüng teimba aliba region ji Africa kümogo. Europe nung Khristan nütsüng million 505 dang kümogo aser North America nunga Khristan nütsüng million 238 dang kümogo. Africa nungbo tang Khristan nütsüng million 697 lir.

Tanüngba region tem nungbo Khristan nütsüng renloker. Sub-Saharan Africa nung Khristan nütsüng million 697 akümbaji shilem 31 agi teimba akümba lir.

2020 küm tashi nung alima

nung Khristan nütsüng shilem 31 bo sub-Saharan Africa nung liasü, Khristan nütsüng shilem 22 Europe nung liasü, Khristan nütsüng shilem 24 Latin America aser Caribbean nung liasü aser Khristan nütsüng shilem 10 North America nung liasü.

Alima nung Khristan nütsüng shilem 10 dang Asia-Pacific aser Middle East-North Africa regions nung lir.

Ano linüktem sasep nung Khristan nütsüng teimba aliba linükji United States lir. 2020 küm tashi nung America nunger nütsüng shilem 64 bo Khristantem liasü. Iba ya asadagra alima nung Khristan 10 shia nungi 1 bo America nunger lir.

Linük 41 nung Khristan nütsüng ajema kümogo; Australia nung points 20 ajema aküm, Chile nung points 18, Uruguay nung points 16, United States nung points 14, Canada nung points 14 aser Benin nung points 5 ajema aküm.

Iba dak alia Khristan nütsüng teimba aliba jenjang ajema akümba linüktemji United Kingdom (nütsüng shilem 49 dang Khristan), Australia (47), France (46) aser Uruguay (44) linüktem lir. Ano Khristan nütsüng teimtiba renlokba linükji Mozambique lir (points 5 teimba aküm; nütsüng shilem 61 Khristan).

Tang yimsü sasep nung Khristan nütsüng teimba aliba linük aser territories 120 lir; 2010 küm nungbo linük 124 liasü.

2020 küm tashi nung alima nung nütsüng shilem 28.8 (billion 2.3) Khristantem lir, nütsüng shilem 25.6 Muslim, yimsü den sendaktepa maliba nütsüng 24.2, nütsüng shilem 14.9 Hindu aser nütsüng shilem 4.1 Buddhists lir.

Alima nung nütsüng shilem 75.8 yimsü ka mesüra ka nungbo dena lir aser nütsüng shilem 24.2 yimsü den sendaktepa mali.

ANO GO ABEN TSÜNGREM DEN

Anogoshia Tepela (T.Ken 118:19-29)

"Kibubai yangluba anogoji ibai lir, asenoki pelateptsü aser iba nung pelaa alitsü" (t.24). Kodang nai item timtem anogotem ajurudir-yipru mopung arudang, rara adokdang, kodang khuretji taret kümdar, kodang ne mulungjang raksadir, kodang ajaki na anema arur ama bilemdir, kodang ne Kotaker Tebui na toktsür ama bilemdir- iba mapang nung iba tekong ya tamang agi temulungjang nung tenoka shisadangang.

Ken zülur tongpang rara aser timtem ajanga oa liasü, aji saka pai ya shiteta liasü, "Tsüngremi iba anogo külemi yutsü süra ni iba nung pelatsü. Tang ni temoatsü menguaka, tamang agi ni ya ashitsü akok, tajung asoshi ibai külemi mapa inyaker. Anungji tang ni ibai ashitsü."

Süia aoba Benjung nung Yihuda nungeri iba ken aten. Yisüia Pa kangki nung mangelokdang iba ken aten. Ne Kalvari leman nung nai ibai shitettsü ta bilemer asü? "Kibubai yangluba anogoji ibai lir, ni iba nung pelaa alitsü." Tanga leman ka nungi yamai ashitsü akok, "Kü mulung masü saka ne mulung süang." Yisui iba ken aten süra, asenokia ibai atentsüla.

Ne anogo tebilemtsü khuret mesüra tejashi agi mokbanga lira, ibaji Tsüngremi agütsü ta agizükang aser Pai reprangdir ta metettang. Tanü Tsüngremi na asoshi kechi inyaktsü, bilema liang aser iba nung pelaa liang. Nai tang Pa nükjidong mangatettsü akok saka kenü angatettsü.

Pastor tem yim telungi maitdaksüba ya temzüng anema lir: Henry Thakur

February 23, 2026:

Justices Vikram Nath aser Chhattisgarh state nung Sandeep Mehta nati akümba Catholic Arogo nung tongti leniri bench-i, temepishiba ken o tawa Supreme Court-i agütsüba agütsürtemi mezüngbuba nung obendang ka atema melung tim ketdangsertem ajurua masüba metetdaksü.

Yimtsüng kar nung Khristan pastor tem aser missionary tem nokdangba anema Supreme Court nung temepishiba ken o benok, ajisüaka Court-i magizük.

Tamalen tribal tesemtem nung village councils-i renemba bangzüng ka Chhattisgarh High Court-i pusema liasü, aser February 16, 2026 nü Supreme Court-ia High Court telemtebaji pusema obendang agütsüogo.

Yimtsüng kar nung yimsüsürtemi Khristan pastor tem aser missionary tem yim sünkümshia nung zülua aliba sünküm adena maitdaksütsü renema liasü.

Raipur nung Archbishop Victor Henry Thakur-i, "Supreme Court obendang atema ni mepelar. Court obendang ya, nisung bendangshidangba lir aser iba obendang ya senso ka yimsü temeden, tangar den pei yimsü lemsateptsü temeden aser sademsadema senzüba temeden anema lir ta ni bilemer," ta metetdaksü.

Sandeep Mehta nati akümba bench-i, temepishiba ken o agütsürtemi mezüngbuba nung tim ketdangsertem ajurua jembiba sülen ang court matsüngdangi aotsüla, ta metetdakja liasü.

Chhattisgarh nung aliba yimtsüng aika nung yim sünkümshia anasa 'Pastor tem aser putirtem yim telungi aittsü memelar' ta zülua lir.

Court nem agütsüba temepishiba shidi nungji pastor tem aser missionary tem nokdangba yim 8- Kudal, Parvi, Junwani, Ghoti, Ghotiya, Havechur, Musurputta aser Sulangi tetshia lir.

Tamalen high court-i, yim sünkümshia nung zülua aliba 'notice' ji linük temzüng alema, ta ashitsü makok, kechiyong ibaji kangshia mesüra mesüzüka yimsü meyipdaksüba nokdangtsü atema lir, iba dak alia lisopur yimsü aser sobaliba wazüka ayutsü nükjidong nung lir, ta obendang agüja liasü.

Chhattisgarh nung Khristan lenirtemi, linük temzüng kübok senso ajak nem yimsü temeden agüja lir, anungji Khristantemi maneni court nung pei temeden atema raratsü, ta shiogo.



Tsüklai 22nd, 2026 Unity Ao Baptist Arogo nung Tetsü Oshi Anogomong among. Iba sentong nung O jembir Wb. I. Anungba Sanglir ajanga, Omen: Tetsü Oshi dangi Meyipdi nung ajemdaker jembia lokti ajak temoatsü nua liasü.

AO OSHI ANGAZÜKDAK:

TANÜ ANGAZÜKTSÜBA OJANG



Tzüta

(n) tzü tamajung atsünga alidak (marsh, swamp)

* Tzüta nung ango malir.

Tzütelang

(n) Ayong tatemlen (delta, mouth of river)

* Akhi mapangbo tzütelang tashi asen Naga lima liasü.

OLONG PAITEP # 7424

1					2				3
								4	
5		6			7				
8									9
								10	
			11		12				
		13							
14					15				
				16					

TIPIEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüik asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 7423 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kiochtsü, 17. Itsük,
- 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

NAI-A YA METETTER



Chinese EV company Nio-i anogo ka nung battery teimtiba melenba otsü ka yangluogo. Taoba ita tu Nio-i hundred-million uses mark tongteta liasü aser tang parnoki anogo ka nung 146,649 EV battery swaps asüba osang metetdaksüogo.

Nio-i China nung charging stations 8,600 tashi lapoka lir aser station shia 20 users teküpok lir.

Meghalaya police-i nakmati 17,000 tonnes puogo



Shillong, February 23, 2026

(Agencies): Meghalaya Police-i East Jaintia Hills nung ozüing alema atuba nakmati 17,000 metric tones aser explosives 25.5 kg ngutetogo.

February 20-21 tsüingda parnoki mita aodang nakmati 17,322 metric tones den explosive material ngutet. Ajisüaka iba mapang nisung apuba osang mali ta East Jaintia Hills Superintendent of Police Pankaj Kumar

Rasgania-i ashi.

February 5, 2026 nü Thangsku nung ozüingi memelaba nakmati atudak lendong atalokdang nisung 34 pokset aser aika yirua liasü. Iba tatalokba sülen police-i FIR 94 tashi benokogo aser ozüing alema nakmati atuba dak sendakba nung nisung 22 puogo.

State sorkari iba lendong bushisüingdangtsü atema Special Investigation Team ka

tentet aser judicial inquiry commission ka nem maparen inyakba asadangtsü mapa nungloktsüogo.

Meghalaya High Court-i ken o tem benoka angadangdar aser tongti police ketdangsurtem jaoka asüingdangyar.

East Jaintia Hills nung ozüing alema nakmatu atudak mita aotsü aser iba mapa inyakertem dak ozüing tapet agi merenshitsü ta ketdangsurtemi metetdaksüogo.

Rabha Hasong nungeri Sixth schedule jenjang meshir

Guwahati, February 23, 2026

(Agencies): Assam nung Assembly election agitsü mapang tonga arudang tongti tesemtem nung yimtenren mopung tesashi aoner aser tesemtem rongnung Rabha Hasong ka lir.

Rabha Hasong Autonomous Council (RHAC) area kübok Assembly constituency pezü nung Rabha Hasong Joint Forum (RHJF) ajanga tongti shilem agitsü ta Chief Executive Member Tankeswar Rabha-i

ashi.

RHJF-i koma koda shilem agitsü mapangtong nung metetdaksütsü saka Goalpara district kübok South Kamrup tashi constituency tem nung inyaksü ta Rabha-i Boko nung osangbener dang ashi.

RHJF-i RHAC region nung Rs 70 crore jungnüa indang mapatongtem inyakdar. Indian Constitution nung Sixth Schedule kübok Rabha Hasong Autonomous Council dendaktsüsüla kechiyong Centre

nungi Rs 300 crore anguba ajanga RHAC nung alir ajak renloktsü ta paisa metetdaksü.

Sixth Schedule framework kübok Council dendaktsüra nisung lakh tenet shi ajangzüksü aser connectivity o infrastructure renloktsü ta Rabha-isa metetdaksü.

Deobarnü RHAC Chairman Sonaram Rabha aser CEM Tankeswar Rabha nati Hahim aser Jongakhuli Council constituency tem nung mapatong aika lapoktsüogo.

Assam nung Rs 80 lakh alang gold biscuits apu

Guwahati, February 23, 2026

(Agencies): Assam kübok Sribhumi district nung Government Railway Police (GRP)-i Rs 80 lakh alang gold biscuits puogo.

Badarpur Railway Station nung Train No. 15626 Deoghar

Express mita aodang hon bona aliba apu. Railway Police personnel-i temulung melemi bilemba agi mita repringdang Abhijit Debnath ta ser nisung ka ket nung 584.04 grams touzük gold biscuits 5 bona aliba angu.

Debnath ya West Tripura kübok Hari Choudhury Para nung alir ta jangjaogo aser pai gold biscuits ji Tripura nungi Guwahati bener aoerba liasü.

Parnoki apuba hon indang jenjangji Rs 80 lakh shi asütsü ta police-i metetdaksüogo.



Tripura Pradesh Mahila Morcha züngsemtemi Tripura Congress Bhavan jakdang Congress lennir Rahul Gandhi mesüka yanglur rongdoka lungkak aitba angur. New Delhi nung India AI Impact Summit mapang Youth Congress züngsemtemi tola mesemi lungkak aitba anema Tripura nung Mahila Morcha züngsemtemi iba sentong ayonga agi.

MULUNGNEN O

"Kü takum Tsüngrem asoshi dang atar; Pa nungi kü tekumtet arur." - Tenüngsang Ken 62:1



Asür Tarep Imchen, IAS (Retd.)
31.01.1966 - 14.02.2026

Onoki teti meima aliba **Asür Tarep Imchen, IAS (Retd.)**, taoba **Commissioner & Secretary to the Government of Nagaland**, shiranga aliba mapang aser akumli wadang tembangba mapang sarasadem, temeim aser yimya balala agi yariteper ajunga dang kinunger temi pelaba lemsateper. Nenoki semdangba, ajungmesoba aser yimya balala nung temeim sayuba ajanga onok tesama tia nung alidang tashi agütsüogo aser anisüngzük nguogo. Onoki nenok dang kanga pelar aser Tsüngremi nenok kija shia mulamushia moajang ta sarasadem.

Onoki alakteta item dang pelaba lemsateper:

1. The Doctors and Nurses of Christian Institute of Health Sciences and Research.
2. The Doctors and Nurses of Apollo International Hospital.
3. Nükmen Baptist Arogo.
4. Longkhum Senso Telongjem.
5. Longkhum Baptist Church.
6. Darogapathar Youth Organisation.
7. Darogapathar Village Council.
8. Darogapathar Ao Senso Telongjem.
9. All Prayer Warriors.
10. IAS Association Nagaland.
11. 1994 Batch, NCS, Nagaland.
12. Tembar, kidanger, kinunger aser temulungertem.

Temeim nung,
Kinungtsü, Jala, Jabaso aser Kinungertem.

MENUNGRA BILEMTETER

TSÜRABUR ASÜR IMDANGLEMLA JAMITSÜR (MOLUNGYIMSEN)



ASO
05.03.1925

ASÜ
24.02.2025

Temeim Oja, Onü, Otzü, na onok nungi pilar tanü agi küm ka junga na onok tenük agi menguaka, nü tamang Sarasadem onok nükla nung teti lir aser menungra-a bilemer. Shia aruba anepdang asenok ajak ajuruteptsü yimla-a atar.

~ Nü temeim Chirnurtem, Semchirtem aser Adianutem.

North Korea ruling party lenir inyaktsü Kim maneni shimogo

Pyongyang, Tsüklai/February 23 (Agencies): North Korea nung tang yimsü tesüdak Workers' Party-i par telok tongti zülur inyaktsü atema ano maneni Kim Jong Un shimogo ta state media ajanga ashir.

Iba sangdong ya Pyongyang nung Deobarnü rubber-stamp party congress nung telemteba agia liasü, koba kanga taoksatsübo mali, kechiaser Kim'er kibongi 1940s tatemlen nungi North Korea yimsü süa arur.

Sorkar meyong KCNA ajanga ashiba agi, Kim lenisüba

kübok North Korea raratsü kanga melenshia talisa nuclear forces asendenshiogo.

Linük balalai mapang talangka nungi sanctions agüja liaka North Korea-i maneni nuclear tashi yangera mapang shia nokdanga aliba intercontinental missiles tem tendang. Ajisüaka iba yimli kanga miimshia yimsü asür asünung, mitkar koba tashi tejangleni aor masadanteter.

2011 küm tebu asüba sülen Kim-i North Korea nung yimsü asütsü tenzüik, aser pai nuclear nok-nü sentong nung rongsen jenti indoka Pyongyang ya West aser talisa US asoshi tebilemtsü tulutiba akum.

Taoba hopta iba mungdang tenzüka jembidang, Kim-i linük indang rongsenketzüng aser nüburtem tia tajungba kumdaktsütsü nangzük, koba kanga tasak aser tang inyaktsüba mapa lir ta pai ashi.

Kim'er jala Ju Ae ya congress nung shilem agitsü asü masü ta nisung ajaki tenük yoka lir.

Ita tetenzüklen South Korea indang itdangiter temibo Kim-i pa melentsü Ju Ae ya shimogo ta shia liasü. La ya arishi küm 13 tain asütsü südi ta amanger, aser lokti sentong, missiles tendangba aser Beijing indang military parade nung tebu den külemi dena arur.

Kim tanaben party lenir shimshiba atema tenüngsang agüja China Tir Xi Jinping-i pa den Hombarnü phone ajanga jembia aser China-North Korea tesendaktep nung kaket tasen zülutsü asoshi Kim den külemi inyaktsü ta shia liasü, ta Chinese state media ajanga ashi.

Beijing ya mapang talangka nungi Pyongyang asoshi tongtipangtiba tembar lir, aser North Korea trade partner tulutiba aser teyari anguba linük lir.

Ajisüaka kasa mapang China-ia Pyongyang indang nuclear mangdang aser Russia Tir Vladimir Putin den tesendaktep tali junga akumba asoshi tebilemtsü akar.

Afghan arrtsü nung telungpur 70 tepsetogo: Pakistan

Islamabad, Tsüklai/February 23 (Agencies): Pakistan nung sorkar ketdangsür tejen kati ashiba agi, linük military-i Afghanistan den arrtsü nung tesem balala anüng ajanga amakba mapang telungpur 70 tepsetogo, koba shitak masü ta Kabul-i shiogo.

South Asian nung kidanger linük ana tsüngda tensa tamajungba küma aoba mapang ka nung Pakistan-i Afghanistan kübok tesem balala maka liasü.

Pakistan indang deputy interior minister Talal Chaudhry-i Deobarnü nikongtsütsü Geo News den sensaksemba mapang, item tesemtem amakdang telungpur 70 tepsetogo ta ashi, saka kuli tejangja magütsü.

Pakistan indang state media-ibo asürtem 80 jungogo ta ashi, saka ketdangsürtem ken o dak sendakba nung osang tejangja magütsü.

Pakistan indang military-i Deobar anepdang anüng ajanga Afghanistan kübok tesem balala makogo. Parnoki ashiba agi, tawa linük yimtiba Islamabad nung Shia mosque ka pei temang nung bomb alenoker pokdaktsürtemi poksatsüba densema tawa tesem balala amakba kiralongrar teloktem tamendakdak balala maka liasü. Linük indang Information

Minister Attaullah Tarar-i X ajanga ashiba agi, itangitertem osang dak ajemdaker military-i Pakistan Taliban telok shirok dang TTP ta ajar parnok tamendakdak aser parnok den sendaktepa aliba teloktem tamendakdak maka liasü.

Tarar-i ashiba agi, Pakistan-i parnok meketa aliba tesem manokshidaktsütsü aser yimjung nung dang toktsütsü meranger, saka Pakistan nung tem kümzüka toktsütsüji ajak dang tongtibangtiba lir.

Tir Asif Ali Zardari-i Deobra aonung menor ashiba agi, Pakistan-i tawa Afghanistan den arrtsü nung tesem balala amakba ya, par nüburtem kiralongrarterem nungi kümzüka toktsütsü atema parnok temeden aliba benshiba lir ta ashi. Paisa, parnoki Kabul nem aiben tekümdangtsü metetdaktsüogo, ta ashi.

Pakistan-i tang item tesemtem amakba ajanga kidanger linük ana tsüngda ceasefire benoka aliba raksatsütsü amokmerener. Taoba küm October ita linük ana arrtsü nung kanga mejungi raratepa sepa, civilian aser telungpurtem aika tepsetba sülen rara anentsü atema ceasefire benoktsü asoshi mulungtepa liasü. Pakistan-i ashiba agi,

parnoki Afghanistan nung Taliban sorkar dang, Pakistan amaktsü atema telungpur telok balala nem Afghanistan litsü mamshidaktsütsü asoshi jenjang agitsü atema Afghanistan dang aiben mepeshia aruogo, ajisüaka Kabul-i item teloktem nokdangtsü atema tang tashi jenjang tapet agia mali.

Kasa mapang nung Afghanistan-i, Pakistan amakba dak sendaka aliba telungpur teloktem par litsü nung amendaka mali ta shia arudar.

Afghan Ministry of Defence-i sangdong ka ajanga ashiba agi, linük anütoklen Nangarhar aser Paktika province tem nung nüburtem aliba tesem balala makogo, kong tamangba yimsü sayuba riju ka aser nüburtem aliba kitem densema lir. Item tesemtem amakba ya Afghanistan indang airspace aser sovereignty anema lir ta kasa sangdong ajanga metetdaktsü.

Taliban sorkar otongdar Zabihullah Mujahid-i ashiba agi, "nüburtem aliba kitem raksatsüogo, parnoki civilian tem dak rangloker inyaktsü aser province ana ya maka temzüng ozüng alema jenjang agiogo."

Nangarhar kübok kinük nung aliba Bihud district nung alirtemi alinungtsütem aser

digger ka amshia ki raksar alibatem nung tasümgangtem bushia liasü, ta AFP news agency sangdong ka ajanga metetdaktsü.

"Idaki aliba nüburtem ya kecha tai maketba nüburtem lir. Yimtsüng nung alirtem ya onok kinungertem lir. Bomb pokloktsüba mapang iba lendong nungi jemboba nisung kati teyari atema ayima liasü," ta Amin Gul Amin-i AFP dang ashi.

Mujahid otongdar katia, iba lendong nung telungpur 70 tepset ta Pakistan-i ashiba ya shitak masü ta shiogo.

Nangarhar province nung Afghan Red Crescent Society indang provincial director Mawlawi Fazl Rahman Fayyaz-i ashiba agi, iba lendong nung nisung 18 asü aser aika yirua liasü.

Afghanistan indang Ministry of Foreign Affairs-i, iba tatalokba anemba metetdaktsütsü atema Kabul nung Pakistan indang ambassador jaoka liasü.

Ministry sangdong ka ajanga ashiba agi, Afghanistan litsü kümzüka ayutsüji parnok indang Sharia khuret lir. Iba sülen tatalokba kechiasa atalokyonga odir aji Pakistan khuret asütsü ta tekümdangtsü metetdaktsüogo.

Kohima Darts Academy semzükogo



Kohima Darts Academy semzükba sentong nung Dr. Tseilhoutuo (Ato) Rhütso aser tangartem tangokba noksa nung angur.

Kohima, Tsüklai/February 23 (TYO): Indian Darts Council (IDC)-i tayrai agüja Kohima Darts Academy (KDA) February 23 nü Naga Hospital Colony, Kohima nung semzükogo.

KDA semzükba sentong nung alakteta jaoker ama o jembiba mapang MLA Dr. Tseilhoutuo (Ato) Rhütso-i, darts asaya nung temaba jenjang tongtetsü atema tanen makai practice süa alitsü nüngdakba lemsatepa liasü.

Paisa, iba academy yangi lanur asyartem aika anitetsü aser tarutsü nung national aser international asyartem anitetsü imlaja ataba lemsatepa liasü.

Dr. Ato-i, iba academy ajanga asayar ka sempet aser tasa arantgetshitsüba dang masü saka iba yagi lanurtem yongtsü nung telongjem adokdaksütsü aser parnok peisasa dak temulung lemteta kümdaksüba den lokti libaren angazüka aotsü imla ataba

lemsatep.

Darts asaya ajungkettsü aser lanur asyartem anitetsü KDA nükjidong lir.

Iba academy nung tebur aser tetsür chanutem küm 8 nungi temapurtem anioxtsü.

Academy nung coaching session balala ayonzüka agütsütsü aser local aser national jenjang nung Kohima yimti aser state tenüng nungi asayamung balala nung shilem agitsü.

Academy nung free-standing dartboard trok amenoka lir aser iba ya yimti temeket nung iba asaya atema training facility tajungtiba ronung ka lir.

Coaching session ya hopta shia Hombor, Bodhbar aser Hokolbarnü nikongtsütsü 4 ako nungi 9 ako tashi alitsü.

Coach aser academy den sendaka aliba volunteer tem ajak ya tajangshiba peria bener aliba asyartem lir, shirnok asyartem dang len sayutsü atema bendanga agütsür lir.

Maneni asyartem terenlok mapangshia asadanga alitsü aser iba dak ajemdaker asyartem renloka yoktsü atema tasa balala asatsü.

Academy-ia local, state aser national jenjang asayamungtem nung shilem agitsü ajungmesor aser asyartem nem tokteptsü atema maongka agütsür.

Academy indang official sponsor aser partner akümtsü atema iba number; 8837267954 nung tongtepreptsü mepeshia metetdaksüogo.

Kohima Darts Academy ya Nagaland nung darts asaya ajungkettsü aser sepet aketba asyartem professional küma asayatsü asoshi lenmang lapoktsütsü nükjidong nung amenokogo.

Academy lapokba sentong nung Nagaland Darts Association, Fun Tree Crew, Team One Nagaland, Dynamic School of Darts, Zumvu Printex, aser Dartskart nungi representative temi shilem agia liasü.

Hundred atema shimtsü meshimtsüji onok kabuma nung mali: Farhan

Tsüklai/February 23, 2026 (Agencies): Pakistan nung asayar Sahibzada Farhan-i ashiba agi, T20 franchise temi Pakistan nung asyartem anisemtsü tejangraba lir ta pai meteta lir, saka Hundred auction nung parnok shimtsü meshimtsü ajibo parnok kabuma nung mali.

Arishi küm 29 tain Farhan ya taruba ita Hundred auction mezüngbuba atema züngoksema aliba Pakistan nung asayar 60 dak tema rongnung ka lir.

Taoba hopta BBC Sport-i, India nung meyong club pezüi Pakistan nung asyartem shimtsü tebilemba mali, ta sangdonga liasü.

"Shibai onok shimer aser shibai meshimer aji onok kabuma nung mali," ta Farhan-i ashi. "Onok shimtsü shirnoki janngar parnoki shimang aser onoka league nung asayatsü renema lir.

"Nüburtemi onok shimtsü mejangrar ta masü," ta paisa shisem.

Pakistan aser India na yimden yimsüsüba tsütsü mangatettep aliba ajanga Pakistan nung asyartem Indian Premier League (IPL) nung masayar aser alima ajunga nung IPL meyong franchise temia iba inyakyim sülen anidakdar.

England and Wales Cricket Board (ECB)-i club tem indang stake ayokba sülen MI London, Manchester Super Giants, Sunrisers Leeds aser Southern Brave nung ya IPL club tem meyong kümogo.

Trent Rockets, London Spirit, Birmingham Phoenix aser Welsh Fire nung ya dang IPL team temi malizük lir.

Farhan ya tang asaya aliba T20 World Cup nung run timtiba yangluba asayar lir aser pai group stage nung Namibia den

asayaba mapang century ka yanglua liasü.

Pa ya iba asayamung atema base price £50,000 nung züngoksema lir. "Ni shimtsü timla akar. Kechiyong asayar ajaki league ajak aser talisa league tajung nung asayaner.

"Hundred ya league tajungtiba rongnung ka lir. Anungji ni asayashitsü imla atar," ta pai ashi.

Pakistan team T20 World Cup nung England den Mongolbarnü asayatsü lir.

Pakistan squad nung asayar 15 nungi 13 bo iba asayamung auction atema züngoksemogo. Batter Fakhar Zaman aser Babar Azam nabo Hundred asayaba mapang Test asayatsü akok.

Left-arm seamer Shaheen Afridi aser Haris Rauf na den all-rounder Saim Ayub nung ajak base price timtiba £100,000 atema züngoksemogo.

El Mencho tepsetba sülen Mexico nung football asayatem thinen

Tsüklai/February 23, 2026 (Agencies): Mexico Army-i Deobarnü FIFA World Cup 2026 asayatsü aliba yimti Guadalajara asaya nung drug cartel tashi tait ka indang lenir ka tepsetba sülen Deobarnü tongtibang football asaya pezü thinena liasü.

Top-tier tetoktepa nung tebur league nung Queretaro vs Juarez aser tetsür league nung Chivas vs America na asaya thinen aser ano second division nunga asaya ana thinena liasü.

Mexico aser Iceland na Bodhbarnü Queretaro kübok Corregidora Stadium nung international friendly asaya ka asayatsü aliba dena Mexican Football Federation-i thitsüogo.

Nemesio Ruben Oseguera Cervantes, shiba dang "El Mencho" ta ajar pa ya Jalisco New Generation Cartel lenir lir. Pa ya Guadalajara nungi ghonda anashi pila Tapalpa

tesem nung yiru aser linük yimtiba Mexico City-i tayimtsü nung anir aoba mapang asü.

Pa asüba sülen cartel züngsemtemi garitem rongtoktsü aser Mexico kübok state ter dak tema nung lenmang nokdanga liasü.

Jalisco indang yimtiba Guadalajara nung ya June ita World Cup asayatem asayatsü lir kong South Korea densema asaya ana asayatsü. World Cup co-hosts Mexico nung ya Spain, Uruguay aser Colombia nungera Akron Stadium nung asayatsü lir.

Jalisco cartel ya Mexico nung cartel tem rongnung tesashitiba ta züngshir, aser parnok züngsem 19,000 shi linük kübok state 32 aliba nungi 21 tashi nung inyaksangshiba asatetogo. Iba cartel ya United States tir Donald Trump indang administration-i kiralongrar telok ka ta agizükogo.

Premier League: Arsenal-i No 1 jenjang yanglushiogo



Tsüklai/February 23, 2026 (Agencies): Deobarnü Arsenal-i goal 4-1 agi Tottenham Hotspur akokba asaya nung asayar Eberechi Eze-i goal ana idakja par team nem teyari tulu agütsü aser parnok Premier League nung tanabuba jenjang nung aliba team dang nungi point pongu agi timba kümogo.

Tanga asaya ka nung Alexis Mac Allister-i minute 97buba nung goal ka idaktsüba sülen Liverpool-i goal 1-0 agi Nottingham Forest kokogo.

Asaya ishika draw süa Manchester City nem tera agi dang memenedpaksüi akümba sülen Arsenal pur pressure nung liasü saka parnoki north London derby ya kanga junga koktetogo.

Asaya nung Eze-i minute 31buba nung mezüngbuba goal idaktsü, ajisüaka mapang tatsüka dang lir Randal Kolo Muani-i Tottenham atema goal ka idakja kasasa aküm, saka asaya tanabuba shilembo Arsenal-i amokbanger asaya liasü.

Asaya tanabuba shilem

tenzüker mapang tatsüka dang lir Viktor Gyokeres-i tanabuba goal idaktsü aser Eze-i tasembuba goal idakja parnok goal ana agi timba aküm. Maneni mapang apuloktsür asayaba mapang Gyokeres-sa goal pezübuba idakja parnoki asaya akok.

Deobarnüsa Liverpool aser Forest na kanga toktepa asayaba sülen asaya atemtsü lia Liverpool-i asaya koka liasü. Iba season coach pezübuba lenisüba nung Forest pur point kabosa angutsü timla nung asaya liasü, saka mapang apuloktsür asayaba mapang Mac Allister-i goal ka idakja Liverpool nem asaya kokdaksü.

Iba asaya akokba sülen Liverpool pur Chelsea aser Manchester United na den point kasa kümogo aser parnok Champions League asayatsü timla mesamai lir.

Maneni Fulham puri goal 3-1 agi Sunderland koka parnok top half-i iogo aser Crystal Palace-ia goal 1-0 agi Wolverhampton Wanderers kokogo.

BILEMDANGANG

"Nü takümji tangar asoshi tatishitsü ka süang."